

M. VALERII MARTIALIS EPIGRAMMATA

VIII, 65

Ad Domitianum

Post victoriam Sarmaticam arcum maximum triumphalem sibi poni iussit Domitianus, quem celebrat poeta.

Hīc, ubi Fortūnae Reducis fulgentia lātē
 templa nitent, fēlix ārea nūper erat :
hīc stetit Arctōi fōrmōsus pulvere bellī
 purpureum fundēns Caesar ab ōre iubar ;
5 hīc laurū redimīta comās et candida cultū
 Rōma salūtāvit vōce manūque ducem.
Grande locī meritum testantur et altera dōna :
 stat sacer et domitīs gentibus arcus ovat ;
hīc geminī currūs numerant elephanta frequentem,
10 sufficit immēnsīs aureus ipse iugīs.
Haec est dīgna tuīs, Germānice, porta triumphīs ;
 hōs aditūs urbem Mārtis habēre decet.